

Bidestveanîna mafên neteweyî
yên gelê Kurd di çarçoveya
Îranek Demokratîk û Federal de

Hejmar: 130
6'ê Adara 2010
Buha: 150 Tûmen

agiri

Pîroz Be 8'ê Adarê, Roja Cîhanî A Jinan

8'ê Adarê, roja Cîhanî a Jinan, roja banga azadî û wekheviya li nav civakê de ye. Vê rojê kariye deng û mebesta xwe bighîne çar aliyên cîhanê. Hêviya me ev e ku alaya azadî û yeksaniyê tim hildayî bime.

8'ê Adarê li hemû jinên cîhanê, Îran û bi taybet jinên Kurdistanê pîroz be.
Desteya Weşana Agirî

Duheftînameya siyasî, civakî, çandî û hunerî

Partiya Demokrat ya Kurdistanê Îranê diweşîne

“Bûna Vê Rejîma Tepeserkar, Bêhurmetî Bi Mirovahiyê Ye”



Komîsera Mafê Mirov a Neteweyên Yekbûyî roja Pêncşemî, 4'ê Adarê, di rûniştina Konseya mafê mirov li Jinêvê de, got: Rewşa mafê mirov li Îranê de xirabtir dibe û ew gelek nigeranê wê rewşa xirab û aloz ya serkuta dijber û neraziyan, destbiser kirina neraziyan, çalakên mafê mirov, rojnamevan û kesatiyên siyasî li Îranê de ye.

Xatûna Pîlay ku rapora rewşa mafê mirov li sala 2009'ê de pêşkêşî civatê dikir, îşare bi serkut û tepeseriya xwenîşanderan li Îranê de kir ku paşan li dadgehên nîmayîşî de cezayên giran yê îdam û zîndanê bi ser wan de tê sepandin. Herweha daxwaz ji Îranê kir ku izna sefera heyetên navnetewî bi Îranê bo lêkolînên zêdetir bidin.

Li heman hal de, Wezîrê Karê Derve yê Almanê, serbarê rexneyên tund ji pêpeskirina mafê mirov li Îranê de, dijberiya xwe bi egera endametiya Komara Îslamî di Konseya Mafê Mirov a Netewên Yekbûyî de derbirî. Gîdo Wêstîrolê, li Jinêvê de ragihand ku cehd û xebatên rejîma Teheranê ji bo endametiya li vî Konseyê de, tohîn û bêhurmetî bi hemû wan buhayan e ku ew Şewre li ser bingeha wê hatiye avakirin.

**Du Îranî û Pênc Îtalî Bi Tawana
Qaçax kirina Çekan Bo Îranê,
Hatî Girtin R: 6**



**Rejîma Îranê di Fîlterkirina
Malperên Înternetî de
Rekorddar e R: 3**



Rûpela 2

Du
Pêşmerge
PDKÎ Tevlî
Karvanê
Şehîdan...



Rûpela 3

3'ê Reşemê,
Xalek reş li
ser eniya
rejîmê û
rûpelek nû ji
xebatê



Selîm Zencîrî

Rûpela 6

Dîdara
Dîktatoran



Arîn

Rûpela 8

8'ê Adarê,
Roja
Navnetewî
a jinan



Perî Reşîdiyan

Rûpela 10

Kurte
Hevpeyvînek
bi
hunermendên
dengxweş...



Hevpeyvîn: Cefer Mubêşirniya

Di bûyereke tirombêlê de

Du Pêşmergekên PDKÎ Tevlî Karvanê Şehîdan Bûn

Pîştînvroya roja Pêncşemî, 25'ê Şibata 2010'an(6'ê Reşemeya 1388'ê Rojî), du pêşmergekên

qehreman, newest û fidakar yê Partiya me bi navên: Cîmşîd Pîrî û Sadiq Reûfî li bûyereke dilêş a tirombêlê de li bajarê Koyê, jiyana xwe ji dest dan û bi yek dunya hêvî û awat ve, xatir û malawayî ji zarokên xwe, hevçeperan û Partiya xebatkar a xwe xwestin û tevî karvanê şehîdan bûn. Erkê domandina xebata pîroz a xwe jî, ji bo hevrêyên xwe û xortên welatparêz yê Kurdistanê bi cî hiştin.

Her di êvarîya wê rojê de, termên wan Şehîdan di goristana Şehîdên PDKÎ bi beşdariya Mistefa Hicrî, endamên rêberî,



kadir û pêşmerge, malbatên wan û hejmarekî berbiçav ji endamên partiyê û herwiha malbatên serbilind ên her du şehîdan di rê û resmekî hêja de hatin veşartin.

Paşan seet 10'ê sibêdehiya roja din, 26'ê Şibata 2010, rê û resmek behî û sersaxiyê bi beşdariya Sekreter, endamên rêberiyê, kes û karên wan şehîdan, kadr û pêşmerge û malbatên wan birêve çû. Di despêka wê rê û resmê de, deqîqeyek bê dengî bo rêzgirtin ji canê paqîje hemû Şahîdên Kurdistanê, piştî çend ayetek ji Qurana

Pîroz hat xwendin. Dûre Mihemed Nezîf Qadîrî, endamê Polîtîbîroya PDKÎ, bi vê hilkevî ji aliyê Deftera Siyasî ve peyamek pêşkêş kir. Di peyama xwe de, kak Heme Zezîf, "hevxiemî û hevderdiya Deftera Siyasî û hevçeperên her du şehîdan, bi malbatên wan re ragihand û serxweşî ji beşdaran, malbatên wan û xelkê welatparêz yê Kurdistanê kir. Herweha rêz ji xebat û tekoşîna wan girt. Li beşek din a peyamê de hatibû ku, ji destdana wan her du pêşmergeyan, xisarek mezin ji bo partiyê, malbatên xwedan qedr yê wan, zarok û hevjînên emegdar yê wan(Xûşke Şanaz Ekberî û Dilniya û Amanc, û herweha xûşke Awat Hesenazade, hevsera şehîd Çiya û xortê şîrîn yê wan Aydiya, bûyereke tal, xembar û dilêş e."

"Lê her wek siroştê mirov û ceribîna jiyane nîşan daye, meznahiya mirov li vê yekê de ye ku li hember bûyerên wiha tal û nexweş de, bi sebr, bêhn fire û ber xwe bide. Lewma çavniheîya me ji malbatên wan û bi taybet hevserên dilşevîti yê wan ev e ku ew erkê giran yê piştî şehîd bûnê ku dikeve ser milê wan, bi awayekî jêhat û hêja birêve bibin û bibine minak û berjenga buhayên mirovî derheq zarokên xwe. Bêşik wê fidakariyê em li wan de dibînin".

Paşan Peyama malbatên her du şehîdan, bi nûneratî ji aliyê kak Burhan Ekberî ve hat xwendin.

Herweha pexşanek bi hest li ser şehîd bi navê "Kotira Sipî" ji aliyê kek Kêyhan Yûsîfî ve hat Pêşkêş kirin.

Di dawîya wê rê û resmê de, beşdar bûyan behî û serxweşîya xwe pêşkêşî malbatên wan şehîdan kirin û hevxiemiya xwe bi wan re ragihandin.

Kurtiyek ji biyogirafiya wan du şehîdan

- **Sadiq Reûfî**, naskirî bi Çiya, kurê Mihemed Elî, xelkê gundê Wîzyer a Kamyaranê, sala 1358'ê Rojî li malbatek



welatparêz de ji dayîk bûye.

- Heya pola Du ya Navendî ders xwendiyê

- Sala 1380'ê hatiye nav refên PDKÎ

- Sala 1387'ê jiyana hevbeş pêk aniye ku berhema jiyana wan, xortekî bedev û şîrîn bi navê Aydiya ye. Heya demên dawîn yê jiyana xwe jî wekî pêşmergeyekê fedakar dirêjî bi xebata xwe nav Partiyê de daye.

Cîmşîd Pîrî, naskirî bi Hosta Cîmşîd, kurê Ebdula, xelkê Kamyaranê, sala 1352'ê Rojî li malbatek welatparêz de hatiye dinê.

- Heya pola Du ya navendî ders xwendiyê.

- Sala 1379'ê bi fermî bûye endamê nepenî yê PDKÎ li hundir de

- Sala 1386'ê bi yekcarî hate nav refên PDKÎ û kicên pêşmergegiyê li ber kirin

- Jiyana Hevbeş pêk aniye û xwendiyê du zarokên delal bi navên Dilniya û Amanc e Ruha wan şad û riya wan pir rêving be.



Peyama Deftera Siyasî seba şehîdbûna hejmarek ji Pêşmergekên Komeleya Zehmetkêşên Kurdistanê

Birêz Deftera Siyasî a Komeleya Zehmetkêşên Kurdistanê!
Di gel rêz û silavan.

Heyf û mixabin nûçeya şehîdbûna Komek ji hevalên Komelê, li roja 2'ê Reşemeya sala 1388'ê Rojî, li devera Serdeştê, ji aliyê hêzên dijî gelf yê Komara Îslamî gihîşt destê me. Ev bûyera dilêş jî mîna hemû cinayetên rejîmê dijî xelkê azadîxwaz yê Îranê û gelê niştîmanperwerê kurd, cihê dax û keserê ye. Mirovkujên Komara Îslamî a Îranê jî bi encamdana vê tawana mezin, rûpeleke pir ji şermezarî û riswayî xistin nav karnamaya reşe rejîma xwe.

Deftera Siyasî a Hizba Demokrat a Kurdistanê Îranê, tevî mehkûmkirina vê

cinayetê, ji Deftera Siyasî a Komeleya Zehmetkêşên Kurdistanê, hevsengerên wan şehîdên serbilind, malbatên wan û xelkê azadîxwazên Kurdistanê, sersaxî û hevxiemiya xwe radigehîne û silavan dişîne bo runa pak yê wan şehîdan û hêvî dixwaze, keç û xortên azadîxwaz yê



kurd bi domandina xebata pir ji şanazî a xwe, hêvî û armancên wan Şehîdên serbilind û hemî Şehîdên rêya rizgarî û azadiya Kurdistanê bi cih binin.

Bi spas ve

Partiya Demokrat a Kurdistanê Îranê
Deftera Siyasî

Rejîma Îranê di Fîlterkirina Malperên Internetî de Rekorddar e

Çar zanîgehên bawerpêkirî ên cîhanê bi navên **Aksford, Kambiric, Harward û Toronto**, çendîn lêkolîn derheq fîlterkirina malperên internetî di 40 welatên cîhanê de encam dane, di encama wan lêkolînan de rejîma Îranê weke rekorddarê fîlterkirina malperan hat nasîn.

Di pêvajoya xwenîşandanên heyamek beriya niha li Îranê, ku nûçe û filmên wê li seranserê cîhanê de belav bû, rejîma Tehranê bi hewce zanî ku fîlterkirina malperên nûçegihanî, zêdetir bike, Lewra sansorkirina malperan xurttir kir.

Kiryara han, di asta navnetewî de hate mehkûmkirin. Saziya Nûçegihanên bê Sînor, Rejîma Îslamê a Îranê pêşengê fîlterkirina malperên internetî di asta cîhanê de, da nasandin.

Kongireya Amerîkayê jî, heyamek berî niha gelaleyek pêşkeş kir û sansora internetî jî aliyê rejîma Tehranê mehkûm kir. Kongireya Amerîkayê xwazayêrê piştevanîkirin jî bikarhînerên internetî di Îranê de ye.

Parlemana Ewropayê jî, meha borî di civîna fermî a xwe a li Strasborgê de, bi pejiranidina biryarnemeyek tund, gişt şewazên fîlterkirin û sansoran, nemaze fîlterkirina internetî û sansora kanalên esmanî, jî aliyê rejîma Komara Îslamî bi tundî mehkûm kir.


Komîsyona Siyasî Nîzamî ya PDKÎ, girtina sê endamên Partiyê red kir

Komîsyona Siyasî Nîzamî ya PDKÎ di daxuyaniyekê de girtina endamên Partiyê li sînorê bajarê Serdeşt û Pîranşarê de bi direw derxist.

Deqa wê aghdariya ku ji aliyê nûçegihaniya Kurdistanê ve hatiye şandin bi awayê jêrî ye.

Agehdarî

Nûçegihaniya "HARANA" li zarê "Xîbir Tîba", cihgirê



ewlekarî û ewlehiya giştî fermanderê sînorê Parêzgeha Azerbaycana Rojava ragihandiyê ku di sînorê bajarê Serdeşt û Pîranşarê de sê kes ji endamên PDKÎ ku di sînor de ketibûn hûndira Îranê, girtiye. Bi wî terzî em raya giştî aghdar dikin ew kesên ku hatine girtin, tu peywendiyek wan bi PDKÎ nin.

**PDKÎ- Komîsyonî Siyasî Nîzamî-
25' Şibata 2010'a (6'ê Reşemeya 1388'ê Rojî)**

3'ê Reşemê;

Xalek reş li ser eniya rejîmê û rûpelek nû ji xebatê



Selîm Zencirî

Îsal 11'mîn
salvegera bûyer û
serhildana 3'ê
Reşemeya 1377'ê
Rojî li bajarê Sine û
bîranîna xwîna bi
neheq rijayî a
xortên şoreşvan yên

wî bajarî bi destê rejîma hov û dijî mirovî a Komara Îslamî ye. Bûyerek ku bûye xal û nuqte guhertinek li dîroka xebata vî gelê mafxwaz de.

Piştî xwenîşandan û dijberiyên kurdan li Parçeyên din yên Kurdistanê derheq girtina Serokê PKK'ê, li Kurdistanê Îranê de jî bi heman şewe xelik bi nîşaneyê hevpewendiya netewî, rijiyane ser seqam û kolanan û siyaseta dujminkaraneya dagîrkeran û yek ji wan jî Komara teror, tawan û cinayeta Îslamî a Îranê mehkûm û şermazar kirin. Eva jî li demekê de bû ku xelkê Îranê bi giştî û nemaze gelê kurd, Kasika sebra wan ji zulm û bîedaletiya Komara Îslamî teji û lûwreji bibû. Her ji delîve û derfetekê digeriyan ku bikarin bi awayekî ektîvîr, serbarê mehkûm kirina rejîmê, daxwaz û xwestekên rewşa û berheq yên xwe jî bînin ziman û berevanî û pêdagiriyê ji tevgera rizgarîxwaziya neteweya xwe bikin. Têgerek ku rejîmê bi hemû hewl, bizav, alav û piropagandayên bi jehr yên xwe, dixwast jînav bibe û li nav gel de jî tu şûnwarekê jê bi cî nehêle.

Lewre hevdem li gel serhildana piraniya bajarên Kurdistanê Îranê, rejîmê xwenîşandana bajarê Urmîyê daye ber pêlên tepeseriyê û çendîn lawên wî bajarî li nav xwîna de gewizandin. Lê xwenîşandan her berdewam bûn, heya wê demê ku

beşdariya berbiçav a xelkê Sine li roja 3'ê Reşemê de, gihaye kopika xwe û gel bi dirûsmên xwe ve da selimandin ku tevgera gelê kurd, tevgera zindî û reh û rîşal dakutayî ye. Wê yekê jî tirs û lîz xiste cism û canê lîzok yê desthilatdaran û bûye sedem ku carek din sirîşt û adetê hov û Sadîsma Komara Îslamî biazire û bi tundtirîn şewe bersiva xwast û daxwazên berheq yên wan bide û sîngê xortên şoreşvan yên Sine jî bike armanca gulleyên xwe, ku li encam de 30 kes şehîd, bi dehan kes birîndar û bi sedan kes jî hatin girtin.

Ew serkut û qetîlam li demekê de bûn ku Mihemed Xatemi, rêberê binav Reformxwaz yê Îranê li ser desthilatê bû û bi dirûsmên birisqok yên xwe û demamka demokrasîyê ve, banga reform û rêzgirtina pir rengî a Îranê diqîrand û hewla veşartina rûçikê rastîn yê Komara Îslamî dida. Lê berevajî, wê bûyerê kakil û naveroka rastîn a binav reformxwazan eşkere kir. Herweha selimand ku Komara Îslamî bi hemû mil, band û eniyên xwe ve, yek armanc û yek siyaseta li hemberî kurdan de hene.

Ew bûyer zêdebarê vê ku zirar û xisarek pir mezin bû bo kurdan, lê bûye sedema yekêti, yekrefî û dînamîzma rabûna gel û destpêka qonaxek nû ji xebata gelê kurd ku heya niha jî dom dîke û li piraniya bone û hincetên netewî, bi taybet li 22'ê Pûşpera her sal de zêde xwe dide nîşandan.

Niha piştî derbasbûna 11 salan bi ser wê serhildanê de, em dibînin ku rejîma Komara Îslamî li tengasiyek siyasî a diwar de asî bûye û roj li pey rojê zêdetir dikewe bin givaşan û tê perawêz xistin. Lewre xincî alozî û kirîz afirandin, tepeserî û kuştina xelkê bêzarbûyî yê Îranê, tu tiştek din bo



Nîmûneyek ji xwenîşandana xelkê bajarê Sine

xwe derbas kirin ji vê çal û kirîza ku bi xwe endazyar û mîmarê kulana wê bûye, şik nabe. Li hemberî vê yekê de jî, bûyerên vê dawiyê û bizavên nerazîbûnê yên xelkê Îranê, eyanker û selmînerê vê rastiyê ne ku xelkê Îranê û bi taybet gelê kurd gelek zanatir û hişyartir jî wê hindê ne ku bikewine dafik û telika binav reformxwazên ku heya duh li hemû cinayetên li dijî wan de beşdar bûn û niha jî ji ber qazanc û berjewendiyên banda xwe û rizgar kirina Komara Îslamî, ji hin taktîkan mifahê distînin ku êdî ji xelkê re rohn û eşkere ne. Bi xweşî ve niha gel bi hişyarî ve pêngavan ber bi pêşve hildigre û heman hest, hêz, îrade, viyan, coş û xuroş û xwîn hene û li cismê wan de diherike ku xelkê şoreşvan û ciwanên biemeg û bihest yên Sine li roja 3'ê Reşemeya 1377'ê de hebûn. Wan bi şehîd bûna xwe rûpelek nû ji xebatê vedan û bi xwîna pak a xwe jî, şene û dara xebata medenî çandin ku niha reh û rîşalên wê, hemû derdora xwe jî dagirtiye û text û bextê dîktatorî û Wilayeta Feqîh xistiye lîzînê.

RONÎ

Quncikek ji bo şiroveya bûyer û babetan ji xwendevanên "Agirî" re

Ebdulla Hicab



Çavên Li Deriya, Xwelî Seriya

Ne ber bi aqilane ye ku tevgera guhertinxwaz li Îranê bi zext û zora dezgehên serkutker bi yekcarî bêdeng bibe û dest ji xebata xwe berde. Lê ev jî xwe xapandin e ku kesek wisan bifikire ev tevger an tevgerek nû ya guhertinxwaz li navxwe an li derveyî Îranê dê bikare di demek kin de sîstema deselatdar biguhere, û piştî guherîna sîstemê bi xwe re hemû pirsgirêkên demokrasî u mafê mirovan li Îranê çareser bike!

Di wê rewşê de pirsên ku dikevin pêşiya tevgera siyasiye Kurd û bersivê zû dixwaz in, gelekin, lê hin pirs bi awayek hê acil xwe nîşan didin û bersivê eşkere dixwazin: Gelo mewdaya navbera me û tevgera hundirî welat çiqas e, daxwazî û hêviyên me ji tevgera navxwe çî ne, û pilana me ya siyasî ji bo pêşeroja welat çî ye û ji bo gihîştina wê armancê, çî pêwîste were kirin? Her yek ji wan çar mijarên bingehîn di qonaxa niha ya xebata siyasî de hewcehiya xwe bi pilansazî û diyarî kirina taktîkên kêrhatî heye. Piştî 30 sal têkoşîna diwar, opozisyona Îranê, tevgera Kurdistanê jî di nav de, derfeta têkoşîna fermî bi riya kanalên legal re nîne. Şeweya xebata serdema şer êdî niha ne karîgeriya caran heye û ne jî derfeta meşandinê jêre amade ye. Xebata veşartî jî li ber zext û zora hêzên serkutker, bi zehmetiyên zêde re rû bi rû ye û nikare bersiva daxwaziyên civaka têniyê azadiyê bide. Têkilî ji derve re bo navxweyî welat bi diwarîyan re rû bi rû ye. Sîstema autorîter rê nedaye ku mekanîzmên alternatîv bo xebata siyasî bikevin rojevê an metodên nû yên xebatê bi pêş bikevin. Tevgera Kurdistanê bi xwe jî, ji aliyekê ve pirojeyek hevbeşe neteweyî bi pêş nexistîye û ji aliyekê din ve jî hê xwe ji zêhniyeta serdema têkoşîna çekdarî xelas nekiriye. Lewma têkoşîna siyasiye hêzên Kurd û bi gîştî opozisyona xwedî paşîneya xebatê bi xebta navxweyî welat re ku di çarçoveya mercên heyî de kar dike re hevaheng nîne. Rastîyek eyan e ku piraniya kesayetî û çalakên siyasî ku îro di hundirî welat de ji bo sererastkirinê siyasî xebatê dikin, bijara wan ya yekemîn ne niha û ne pêştir bi daxwazî û bernameya opozisyona rêjîmê re yek nîne û yek nebûye. Piraniya wan kesan hê girêdayî hin pîvan û prensîpan in ku bi xwe bi pîvan û nîrxên demokrasî û mafê mirovan, weke me bawerî pê heyî re hev nagrin. Lê di heman demê de civaka medenî û neteweyên bê maf hene ku ji ber mercên jiyane îmkannîn

in bi daxwaziya xwe riya xebatê an aliyê siyasî hilbijêrin. Di gel ku piraniya wan bi opozisyone re bin, lê nikarin bi eşkere beşdarî xebatê bibin. Ji ber wê yekê dema îro derfetek kin li pêşiya xwe dibînin, wan ala û duruşmeyan hil didin ku derfeta gotin û hildana wan heye, lê di heman demê de jî nîşan didin ku ev nerazîne. Dema hin kesayetiyan nû riya xwe ji ya sîstemê vediqetînin u taze hest dikin ku çarçoveya sîstema Komara Îslamî hin qas teng e ku tenê bi kêrî binajo, tundajo û paşveroyan tê, tiştê xwezayî ye ku gel bersivê xwe ji wan re veke.

Her çend bi sinûr kirina deselata hin kes û dezgehên zêde dij demokrasîyê bi xwe karek erênî ye, lê ji bo sererast kirinê siyasî têr nake. Ber wê yekê mewdaya navbera tevgera siyasiye neteweyên li derveyî bazneya deselatê û xebata ji bo bi cîh kirina xal û birgehên yasya gîştîye îro pir zêde ye. Ya rast hemû hêvî û daxwaziyan tevgera siyasiye Kurd an hêviyên neteweyên li derveyî bazneya deselata siyasî li Îranê, bi daxwazî û bernameya siyasiye tevgera nû re yek nînin. Lê di hin milan de aliyên wekhev xuya ne û dikarin werin xurt kirin û bi hev re bêne hevaheng kirin. Ji ber wê yekê her çend Kurd û neteweyên din di wê tevgerê de beşdar bin, lê dîsan bi pêş xistina daxwazî û dengvedana hêviyên neteweyên dûrî deselatê di nava tevgera nû de pir giring e.

Tevger an tevgerên navxweyî welat ji bo ku bikarin pitir derfeta xwenîşandan û xwe xurt kirinê bi dest bixin, dikarin û pêwîste zêde hevahengiyê bikin. Di heman demê de jî dikarin bi daxwazî û bernameya xwe û bi merc hin pêgavên hevbeş jî bavêjin.

Lê tevgera Kurd pêwîste ji danîna bernameya çalakîyan ji bo tevgera hundir, pilanek stratejîk ji bo pêşeroja Îranê jî eşkere bike. Tenê hewl dan ji bo bi pêşxistina ruhê berxwedan û serhildanê têr nake. Ev jî ne bese ku em bêjin pêşeroja gelên Îranê bi guhertina rêjîmê û bi demokrasîyê ve girêdayî ye. Hem şeweyên cuda yên guhertinê hene û hem modelên cihêreng demokrasîyê. Ji wê jî bi der, têgeha demokrasîyê bi xwe gotinek zêhnî an subjektîv e ku zehmete her demê bi yek pîvanê were nîrxandin. Di hin şeweyên demokrasîyê de hilbijartin jî ku bi xwe bingeha sereke ya sîstemê ye, xirab tê bikar anîn. Lewma tenê bas kirin ji demokrasî, ya heta bas kirin ji sekolarîzm û guhertina rêjîmê nikare bi xwe zamanetê bide gelê Kurd ku wê bikare li pêşerojê di



pêvajoya siyasiye welat de xwedî biryar be.

Di wê rewşê de pêwîstiya tevgera Kurdistanê bi pilansaziye nû ya siyasî heye ku xwedî hin karakterên bingehîn be

1: Nasnameya neteweyî Kurd weke nasnameya sereke biparêze û hemû nasnameyên din weke nasnameyên lawekî ku di encama pirojeyên siyasî de û bi lihevhatinê pêk tên pêname bike

2: Bi siyaseta yek partiyê ve girêdayî nebe

3: Reng u cewherê neteweyî pêve diyar be

4: xwe ji îdeolojî an rêbazek tenge hizirî biparêze

5: pîvanên mafên mirovan, mafê tak jî di nav de, ji xwe re bingeh bigre.

6: kêmasiyên ku ji ber rewşa siyasî di civaka Kurdistanê de reh girtine, weke rewşa mafê jinê, rewşa tak û hurmeta îradeya kesane u gruppan bibîne û rêçareyan jêre pêş bixe.

7: Kermaeta tak weke bingeh ji bo bi pêş xistina hurmeta dualî biparêze û di xebata xwe de wê yekê bi bingeh bigre.

Ji bo bipêşxistina pilanek siyasî li ser bingeha pîvanên ku li jor hatin rêz kirin, pêwîstiyek acil û bi pilatfomek hevbeşa siyasî bi beşdariya hemû hêzên pêkhînerên tevgera Kurd heye. Eger ev pêwîstî neyê dîtin û ji bo li hev hatinek neteweyî pêgavên bilez neyên rakirin, dubare çavê me wê her li rê be ka kengê deriyek vebe. Bê guman, deriyê ku bi îradeya Kurdan bi xwe venebe, tu gav nikare derfetek siyasî ji gelê Kurd re pêk bîne ku bibe hegerê çareseriya meseleya neteweyî.

Êdî niha pîrsa sereke ev e ka gelo tevgera siyasiye Kurd li Rojhilata Kurdistanê amade ye li gor her yek ji wan hewcehiyan ku li jor hatin rêz kirin, bersivê bibîne? Eger ne wisa be û gera li pey rêçareyan ji niha ve destpê neke, siberoj wê pir dereng be. Eger pêşengên siyasiye Kurd li bendê bin ku tevgera navxwe an jî bizevêk ji derve re hin guhertinan pêk bîne an zeminê beşdariyê ji wan re amade bike, wê demê gotina bab û kalan wê bersiva herî baş be; "çavên li deriya xwelî seriya!"

Hêza herî zêde bo Tevgera Sivîl



Azad Kurdî

Di xebat û tekoşîna hemû neteweyên bindest ji bo bidestveanîna azadî, demokrasî û mafê neteweyî de, sîstema siyasî a

desthilatdar û qanûnên wê hikûmetê diyar dikin ku tevgera siyasî – sivîl çî stratejî û taktîkan bo dabînkirina xwestekên xwe ên siyasî, sivîl, civakî û wd di xebatê de bimeşîne û tevgera xwe pêşde bixe.

Xebata sivîl proseyek e bo gihîştin bi daxwaziyên sivîl û demokratîk û hewldan ji bo parastina wan mafan di civakê de. Piraniya tevgerên sivîl ên cîhanê xebata xwe bi awayekî aştîxwazane û dûrî tund û tûjiyê meşandine, lê di welatên dîktator de xebata sivîl bi dijîkariyên dewletan re rûbirû dibin û tundûtûjiyê li dijî çalakvanên sivîl dimeşînin. Bikaranîna metodên nû ên xebata sivîl yên bê tundûtûjî û aştîxwazane li kêleka rêbazên kevin ji aliyê tevgerên civakî – siyasî li Ewropaya Rojhilat, Komarên Asya Navîn ku piştî hilweşandina Yekîtiya Soveta berê hatin avakirin û heta li Amerîka, karîn serkeftin û destkevtên pirr mezin bo vê tevgerê bidest bixin.

Di zanista siyasî de jî, gelek şewazên xebata sivîl hatine destnîşankirin ku her yek ji wan dikare di her welat û civakê de were bikaranîn û bandora xwe jî bilîze. Gelek awa û rêbazên xebata sivîl hene ku li gor sîstem û rewşa siyasî û civakî ya her welatekê tîn bikaranîn. Lê xwenîşandan û kombûnên nerazîbûnê awayekî herî sereke ye ku xelkek zêde ji bo amanceke sivîl a diyarîkirî li dora hev dicive. Hewcehiya sereke ya vê cure xebatê, hebûna civaka sivîl e ku divê sîstem pêk bîne û mafên medenî, senfî û pîşeyî ên welatiyan berçav bigre û wan mafan binpê neke.

Xebat û çalakiyên sivîl di civakê de li gor sîstema siyasî ya welat tîn organîzekirin û rêbaz û armancên wan ji welatekê bo welateke din cuda ye. Lê bi giştî, xebata sivîl ji ber taybetmendiya xwe yên erênî, dikare roleke bi bandortir di civakê de bilîze û armanc jî zûtir û

hêsantir misoger dibin.

Lê di welatekê de ku sîstema wê ya dadê qanûnan neparêze, maf û azadiyên welatiyan berçav negire, ne tenê bê fermaniya sivîl nikare bê pêşbînîkirin, belku mafê nerazîbûn di çarçova qanûnê de jî dibe sedema ceza, tawan û tometên giran ji aliyê desthilatê. Bo nimûne riftara Komara Îslamî ya Îranê ligel çalakvanên sivîl li Îranê, bi taybet li Kurdistanê. Ji ber ku her cure meş û nerazîbûneke sivîl li Îranê ligel lêdan, bêhûmetî, girtin, kuştin û îdamkirina xelkê nerazî rûbirû dibe. Riftara tundûtûjî a hêzên Komara Îslamî ligel xelkê nerazî bi encama gera dehem a hilbijartina Serkomariyê dikare mînaka herî dawî be. Yan mirov dikare pêla berfireh û bêrawestan a girtin, lidarvekirin û cezayên giran ên girtîgehê bo çalakvanên sivîl û mafê mirovan li Rojhilatê Kurdistanê wek mînaka gellek berçav bide xuyakirin.

Dibe ji ber vê sedemê be ku gelek filosofên siyasî wek Can Ralz, Hana Arent û Habermars tekezê dikin ku xebata sivîl, tenê ji bo rewşeke taybet ji civakeke demokratîk û niv dadmendî tê rojevê. Lewra hikûmetek wek Komara Îslamî ku ji xebata sivîl a welatiyên xwe ditirse û bi awayekî pirr tundûtûjî bi wan re tevdigere, ne demokratîk bûn û ne adilanebûna xwe derdixe holê. Her wek Habermars dibêje: "Reaksyon li hember xebata sivîl a welatiyan, ceribandîna fehmîkirin ji sîstemeke xelk serdest e."

Bi giştî di prosa xebata sivîl de ku çend sal e li sernanserê Îranê, bi taybet li Rojhilatê Kurdistanê destpê kiriye, armanc di çarçova bidestveanîna maf û azadiyên sivîl û welatîbûnê û cihgîrkirina demokrasî û azadiyên demokratîk û nemaze parastina mafê mirovan de tîn meşandin.

Tevgera sivîl li Îranê ligel pirr astengên cidî rûbirû ye û bersiva çalakiyên sivîl û aştîxwazane bi tundûtûjiyên dijwar tîn bersivdan. Komara Îslamî bi hemû alav û amûrên leşkerî, medya û hêzên çekdar ên qirkirin, derheqê vê tevgera sivîl a destvala û aştîxwazane ya xelkê nayê. Lê xelkê Îranê bi giştî, nemaze netewa Kurd, bi nasîna naverok û cewhera rastîna a Komara Îslamî, dest bi xebata sivîl kirine û roj bi roj qada wê xebatê



berfirehtir dibe. Her çiqas di welatek wek Îranê de xebata sivîl jî bi qasî xwe bedel hene û berdeham goriyan digire, lê xelk ji wan bedel û nîrxdayînan natirse û çalakiyên sivîl li sernaserê Îranê roj bi roj xurttir dibin, bi taybet li Kurdistanê xîmê xwe bi tevahî dakutaye. Lê di hikûmetên dîktator û serkutker de, bêfermanîkirina sivîl li hember sîstemê di warê siyasî, abûrî, civakî û kultûrî dikare awayên baş bin ku nîrxdayîna kêmtir be. Rêbazek ku ji berê ve Kurd bi başî meşandine û niha jî tê rêvebirin. Ger mirov bi hûrî lê binêre, li Rojhilatê Kurdistanê bi salan e baykuta li ser desthilatê di her warekê de tê xuyakirin, ev tevgeriyana xelkê ku her tiştê dewletê bixwaze, gel berevajî wê tevbigere û baykut bike, bi xwe curek ji xebata sivîl tê hesabandin.

Gelek taybetmendî hene ku dikarin çalakiyên sivîl yên xelkê pêşde bibin, lê giştîbûn û berfirehbûna têkoşîna sivîl dikare faktorek bibandor be bo pêşdeçûna xebatê û dabînbûna aramcê wê xebata hêja. Di vê derbarê de organîzekirin û rêxistina tevgerê pirr giring e.

Eger li Rojhilatê Kurdistanê partî û rêxistinên siyasî xebat ji bo azadî, demokrasî û mafê neteweyî dimeşînin, lê avakirina NGO, sazî û komeleyên sivîl, civakî, çandî, hunerî û wd li hundirê welat û çalakiyên wan yên sivîl û aştîxwazane û dûrî tundûtûjiyê, dikare ji bo pêşdeçûna xebata sivîl li Rojhilatê Kurdistanê gelek bibandor be. Rêbazek ku niha ligel hemû astengî, dijarî û bîedaltîyeke hiqûqî û dadê li Îranê, gelê Kurd destpê kiriye. Bi terxankirina hêza herî zêde bo xebat û çalakiyên sivîl, bîguman civakeke bihêz a sivîl li Kurdistanê çêdibe û dikare bibe bersivderê dîktatoriyetê û binpêkirina mafê xelkê.

Zext û givaşên parastina Zanîngeha bajarê Urmîyê bo ser xwendekar û karmendên kurd

çend xwendekarên kurd ên zanîngeha Nazlû Azad, peyama Nûr û Xeyre Întifai ya bajarê Urmîyê ku di Roja Cîhanî ya Zimanê Zikmakî de, bi Kincên kurdî çûne ser kîlasên xwendinê, bo parastina wan zanîngehên navhatî hatine gazîkirin.

Nûçegihaniya kurdistanê di vê derbarê de ragihand, parastina zanîngehên navhatî bi karmendên Kurd ragihandine ku nabe digel xwendekarên Kurd de bi zimanê Kurdî bipeyvin. Heke ne, dê li ser karê xwe werin derkirin.

Desttêwerdanên Komara Îslamî li karûbarên Îraqê hevdem li gel Nizîkbûna Hilbijartinên Parlamani

Nûrî Malikî di bereberê hilbijartinên Îraqê de, hevvelatîyên rikeber ên xwe bi pere wergirtin ji hêzên biyanî tometbar dike. Li gor rapora BBC, ev axaftinên Malikî di demekê de ye ku komek ji saziyên siyasî navhatî tawanbar bi girêdayî bûn bi Komara Îslamî re dikin. Midehekê berî niha Kirîstofêr Hêl, balyozê Amerîkayê li Îraqê gotibû: Îran xwediyê berjewendiyên neyarane ye li Îraqê de, ku Malikî di hevpevîna bi BBC a Erebi de berevanî li Îranê kir û ew tawan jî red kirin. Bi taybet niha li ser û bendê hilbijartina Parlamani a Îraqê, Îran hemû hewla xwe dide ku lobiya xwe bihêz bike û ji hêla din jî nearamî û aloziyan pêk bîne.

Deverek Bajarê Makoyê Hat Topbarankirin

Heyamek berî niha, hêzên Sipaha Pasdaran ên rejîma Îslamî a Îranê, devera Kire ya bajarê Mako topbarankirin.

Nûçegihaniya Kurdistanê di vê derbarê de ragihand, hêzên Sipaha Pasdaran ên rejîma Îranê diwxazin binkeye leşkerî di vê deverê de vekin. Wan hêzan bi şev û bi rojan bêtir hebûna biyara dedgehê, êrîşê dikin ser malên xelkê wê deverê û malên wan digerrin. Hêjayî gotinê ye ku hêzên Sipaha Pasdaran ên Îranê diwxazin bi wan kiriyarên xwe xelkê wê deverê çavtirsîn bikin, lê ew kiriyara hêzên rejîmê bûye sedema bêzarî û tevlihevkirina jiyana xelkê wê deverê.

Zext û givaşên hêzên rejîmê bo ser xelkê gundên Urmîyê zêde bûye

Di midehê çend rojên borî de, zext û givaş û gefên hêzên Komara Îslamî bo ser xelkê gundên, Berdekeşk, Qamişlû, Nenas, Naznaz, Zêwe, Nasirava û Delo Derbend a bajarê Urmîyê zêde bûye.

Nûçegihaniya Kurdistanê di vê derbarê de ragihand, berpirsê binkeya Reşkanê bi şandina nameyekî fermî, xelkê wan gundan haydar kiriye ku bi zûtirîn dem serdana wê binkeyê bikin û berpirsên peywendîdar xatircem bikin ku tu terze tîkeliyek bi PDKî ve ninin û dibe wan li her terze çalakî û piropaganda yê endam û alîgirên PDKî haydar bikin û eger rêveberên wan çalakîyan bi berpirsên peywendîdar nedin naskirin, wê demê bi tometa hevkarî digel PDKî dê bihên ceza kirin.

Li gor wê çavkaniyê heta niha gelek kesan serdana wê binkeya rejîmê kiriye û bi neçarî formek ji wajo kiriye ku rejîm li gor wê yekê dikare di pêşerojê di organên tepesker de bi dadgehê re berbirû bikin.

Herwiha berpirsê hêzên tepesker ên rejîmê di Reşkanê daxwaza kopîya nasname û cihê akincî bûna tewahiya endamên wê malbatê kiriye ku di midehê çend rojên borî de serdan wê binkeyê kiriye.

Rojev

Dîdara Dîktatoran

Arîn

Tenê rojek piştî wê ku Hîlarî Kilînton, Wezîra Karê Derve ya Amerîkayê nîgeraniya xwe derheq

pêwendiyên Îran bi Sûriyayê re derbirî, Ehmedînejad li ser deiweta fermî gihîşt Sûriyê û bi hevtayê xwe, Beşar Esed re civiya. Herweha bi cuda, dîdar û hevdiîn bi girûp û rêxistinên terorîstî û dijberên aştiya Rojhilata Navîn re pêk anî û weke sê aliyên berxwedanê, peyamek hevbeş dan neyarên xwe û gerku bixwaze vê carê gefan bixwe yan şasiyek din dubare bike, dê vê carê bi tewahî jiholê rabe. Bi watayek din mirina yekcarî.

Eve jî li halekê de ye ku Amerîka, Ewropa û Îsraîl wan girûp û rêxistinên bi terorîst, herweha Îran û Sûriyayê jî bi piştevanê terorîzmê tawanbar dikin. Dîdara dîktatoran li demekê de ye ku ji aliyekê ve hewl û bizav, ji aliyê dinê ve jî zext û givaşên navnetewî û bi taybet Amerîkayê li ser Sûriyê xurt bûne bona wê ku bikarin ji Îranê dûr bixin. Em dibînin ku her yek ji Amerîka, Erebiyana Seûdî û Ewropa siyasetek nermtir û rûpelek nû ji pêwendiyên bi Sûriyê re vekirine.

Nemaze Amerîka piştî 5 salan bi ser teror kirina Refîq Herîrî û vekîşandina balyozê xwe ji wî welatî bi nîşaneyê nerazîbûn li hemberî desthebûna li terorê de, niha ser ji nû ve dîplomatek payebilind yê xwe (Rabîrt Ford), bi fermî wekî balyoz bi wî welatî da nasandin. Ku eva jî derfetek e li pêşberî rayedarên Sûriyê de ku çawan bikarin mifahê jê bistînin û li nav hevkeşeyên siyasî yê deverî û cîhanî de jî rola xwe bilîzin.

Li vê navberê de herçiqas ku rewşa siyasî ya Îranê, him li navxwe û him jî li derve de gelek aloz, şepirze û rastî tengasiyek bêwêne hatiye, û girovera dorpêç û givaşên cîhanî jî roj li pey rojê li dijî, tengtir dibe û pêtir dikeve perawêzê, lê dîsan bi rewşa siyasî a Sûriyayê re ferqek zaf heye. Lewma li vê derheqê de desthilatdarên Îranê ketine ser dest û lepa û diwxazin bi her nîrx û qîmetekê be, pêwendiyên xwe bi take hevalbendê ereb yê xwe re biparêzin û heya radeyekê xwe ji kirîza dîplomasiyê rizgar bikin. Serbarê wê ku her du welat li çend xal û fakterên hevbeş de girêdayî hev in û divê qazanc û berjewendiyên hev bergav bigrin. Yan bi awayekî din, ew fakterên hevbeş, wan neçar dike ku li kêlega hev de bimînin:

Bûna hevalbendiyek kevnar, bûna sîstemên desthilatdariya dîktatorî û nedemokratîk, piştevaniya terorîzmê, desttêwerda li kar û barên welatan de, hewildan bo bidestxistina çekên komkoj, dijîberiya bi prosesa aştiya Rojhilata Navîn,



herweha her du jî ketine ber tehrîmên Amerîka û hw.

Lê ev sefera du rojî ya Ehmedînejad li vê zirûfa hesas û hestiyar de bi giştî dikare çend armancên sereke şopandibin:

- Nûkirina peyman û hevalbendiya bi hev re û xwe berhev kirin bona ber bi rûbûna bi her êrîşekê re

- Pêşkêşkirina hevkarîyên madî û menewî bi girûpên terorîstî weke Hizbula, Hamas û ... herweha destxweşî kirin ji wan bona beşdarî kirin li tepeskerkirina nerazî û dijberan li Îranê de û haydana wan bo berdewamiya vê pêvajoyê li pêşerojê de.

- Afirendina şer û aloziyek nû û teyîsandina şerek din li deverê, bona berxwar kirin û bi larêde birina raya giştî ji rewşa siyasî a hudir, pêpes kirina zêdetir a mafê mirov û tepeser kirin û temirandina bizavên nerazîbûnê li gor dilê xwe û bi dûr ji raya giştî.

- Bi vê çendê jî demek din bo xebatên navikî yê xwe bidest bixîne

- Herweha bi wan gef û guran, cîhanê jî sepandina ceza û hisarên pêtir bo ser xwe dudil û poşman bike

Armancek din ku bûye beşek neveqetiyayî ji siyaseta derve ya Komara Îslamî, şandina tovê şîe geriyê bo cîhana Sunniyan e. Bê şik di vê seferê de, xebata di vê çarçoveyê de jî ji xwe re hêsantir û bi tesîrtir kir. Ew jî bi hilgirtina Vîza û belgeyên hat û çûnê bo hevvelatîyên her du alîyan. Çunku her sal bi hezaran Îranî bo ziyaret û dîtina navendên mesebî sefera Sûriyê dikin ku çavkaniyek baş ya dahatê bo Sûriyayê jî tê hesabansin. Xêncî wê jî Komara Îslamî di çarçoveya karê nûjenkirin û xemlandina wan navendên mesebî de, armanca sereke ya xwe ku şîe gerî ye, bi nîşange digre.

Serbarê vana, vê gavê Sûriya ji her du alîyan dixwe, lê wekî xuya carê qazanc û berjewendiyên xwe li rex Îranê de dibîne. Lê hevalbendiya wan dê çiqas dewamê bîne? Yan kengê Sûriya dê bikare dev ji Îranê berde û tevî civaka cîhanî bibe? Pirsîyarek e ku girêdayî bi parseng û terazûya nîrx û poanên her du alîyan bo Sûriyê li pêşerojê de heye.

Şanaziyeke Din Ji Bo Rejîma Îranê, Temenê Xwefiroşiyê daket 10 Saliyê

Civaknas û mamostayekî zanîngehê, di hevpeyînekê de tevî nûçegihanê "Farda"yê, ragihand: Di Îranê de diyardeya jinên ser şeqaman ber bi zêdebûnê diçe, encama lêkolînan derdixe ku temenê xwefiroşiyê, daketiye 10 saliyê û pirraniya xwefiroşan, ew keçên ciwan in, ku teze tevî wî karî dibin.



Dr. Emanulah Qerayî moqedem, derheq derketin û belavbûna sedemên xwefiroşiyê di welat de dibêje: Girîngtirîn sedema derketina diyardeya han hejarî û, bêşiyar bûna jinan e di dabînkirina bijîva jiyanê. Navbirî herwiha serhildana diyardeya jinên ser şeqaman vedigerîne bo telaq û bê serberiya malbatan, Koçkirin, nexwendewarî, neagahî û îtiyad û helatina keç û jinan ji malbatê xwe. Sedema herî girîng a helatina wan keç û jinan jî, alozbûna bingeha malbatê ye û ev aloziya jî tenê di warê aborî de nîne. Wî herwiha eşkere kir ku tu sazî û navendek di welat de tune ku bikaribe bi terzek rêk û pêk û dirust lêkolînê li ser pirsên jinên ser şeqaman bike, lewra tu serhejmariyek rast û cihê baweriyê bona çareseriyê pîrsa han nîne. Di halekê de ku diyardeya jinên ser şeqaman, yek ji xesarên girîng ên civakî ye.

Li gorî vê çavkaniyê ji her 6 malbatan, yek tûşî cudabûnê dibe ku eva jî dibe sedema qutbûna çavkaniya dahata wan û rêxweş bûn bo wî karî.

Seba nebûna serhejmariyek rast, piraniya terhen ku ji aliyê saziya "Bihzistî" ve derheq rêxistina jinên ser şeqaman beriya niha hatibûn pêşkêşkirin, seba nepejirandina wan ji aliyê civak û berpirsan ve, tûşî şikistê hatin û neketin qonaxa çibçikirinê.

Lewma diyardeya han serbarê xurtbûnê, gelek nesaxiyên weke îdzê jî zêde kirine.

Terha Xanenişîn kirina Gişt Jinan Di Rejîma Îranê De "Birêveberiya jinan di civakê de, hizrek Rojavayî ye ku dize kiriye bo nava Îranê"

Endama Komîteya birêveberî a Navenda Karûbarên jinan got: Nabe beşdariya jinan di astên birêveberî de bibe bingeha xurtbûn û pêşketina welatê me. Çimku Rojava ev baweriyê afirandiye ku dibêje pêşketina welat, girêdayî beşdariya jinên birêveber di asta civakî de ye.



Pêka rapora nûçegihaniya "Mêhr"ê, Zehra Şerefedîn, di civîna rênimayîkirina komîteya lidarxistina rê û resma rêzgirtin ji kesayetiya jin û dayikê, tevî îlankirina vê mijarê, got: Bona berbirûbûn û berevanîkirin li hember hizra Rojavayê, çawa wan birêveberiya jinan di civakê de cihgir kiriye, divê em jî birêveberiya jinan di mal û malbatê de cihgir bikin û çanda han bişînine cihanê.

Wê tevî tekezîrîn li ser vê yekê ku nabe jin tenê di çarçoveya birêveberiya civakî de were nasandin, got: Divê em jina maldar weke sermesq û nimûne bidin nasîn û wan bo civînê siyaseta darêjiyê gazi bikin û wan di birêveberiya mal û malbatê de bihêz bikin.

Zehra Şerefedîn, sedema jordecûna asta cudabûn û jihev veqetiyana di civakê de veqerande ser berçavnegirtina hîcaba Îslamî ji aliyê jinan, îxanetkirina wan bi hevjinên xwe û şandina peyaman ji rêya mobaylan bo hevkarên xwe ên mêr re.

Rewşengerî û Tepeserî

Bikaranîna serbixweyî a têgihîştinê bi awayek eşkere yan jî balixbûna eqil, Pênaseya "Amanoel Kant", "fîlsofê binav û deng ê Almanî ye li ser rewşengeriyê. Eger em vê pênasê bikin bingehe û bi wê dîtinê li xelkê Îranê bifikirin, ev yeke piştrast dibe ku nerazîbûnên wê dawiyê ên xelkê Îranê, berhema gihîştina wî xelkî bitaybet ciwanan bi qonaxa rewşengeriyê ye.

Eger mirov çavek li derbazbûyî a kurta vê bizava nerazîbûnê bike, derdikeve ku qonaxa despêka wê, bi xwastikên sereke, weke peydakirina deriyekê, bikar anîn û zû li wê qunaxê derbazbûn û gihîştin bikaranîna serbixweyî a têgihîştina xwe ku radîkaltirbûna dirûşman, mînakek zîndî bo vê yekê ye. Her eva ku di mîdehê 30 salan de, beşek zaf ji xelkê Îranê dijberî bi awayek veşartî di xwe de diperwerand û di dawiyê de tex û qten curbicur ên xelkê tevî refa wî xelkê bûn û bi awayek eşkere di dirûşman de xwestikên xwe dixin ber çavên cihan û desthilata hakim di Îranê de.

Ewa ku xelk di dirûman de dixwaze ev e ku bila kes şîweya jiyanê ji me re hilnebijêre, kes bi nûneratiya Xedê hizrên xwe bi navê ayîn û şerîet bi ser me de nespîne û girtin û kuştina cudabîran bi dawî bê... Evane hin mesele ne ku bi bawera xelkê di çarçoveya serbestiya wan de nehiştine û weke mafek şiroştî yê wan ji aliyê desthilatê ve hatine zewtkirin û hin kesên din li cihê wan difikirin.

Dema ku ew karê han givaş û bê edaletî gihand ser hestiyên xelkê û tu rê ji bo bikaranîna hizrên serdemiyane neman, ew wêrekiya ku rewşengerî pê tê naskirin, ji aliyê xelkê ve tê bikaranîna di pêxema wê yekê ku ger ew pêvajoya han berdeham be, arasteya wê dê ber bi çî tarîtiyekê ve biçe. Lewre di vê riyê de xwîna xwe dirêjin ku ew jî hebûna wêrekî û nîşandana hişyarî û têgihîştina serbixwe ya wan ji bo diyarîkirina sistemek dilxwaz a desthilatdariyê bikar tînin.

Lê bi hebûna rejîmek wiha ku rewşengeriya bi pênaseya Kant, bi têkdana ewlehiya welat û gunehbar kirina ciwanan bi kopalbidiyê welatên biyanî dihesibandin, vê yekê piştrast dike ku melayên tarîperest yê deshelatdar di Îranê de welat, xelk, çand, abûrî û hemû madiyat û manewiyatekê di çarçoveya têgihîştina paremayî a xwe de dibînin. Ligor pênaseya Kant, desthilata ku bibe sedema pêşgîrî ji balixbûna eqilê tak û civakê, ew bi xwe jî di eqlek nebalixbûyî de diji. Yan jî li wî warî de têgihîştin hene, lê balixbûna têgihîştinê bi xeterek li ser desthilata xwe dizane.

Di demek wiha de mirov dikare bêje ku desthilatdariya Îranê di hizrek nebalixbûyî a sedsalên navîn de desthilata xwe li ser hizra pêgehiştî û serdemiyane "balixbûyî" a xelkê Îranê de dimeşîne. Nimûne girtîgehên teji rojnamevan û rewşenbîr û bîrmendan in.

c_m_s24@yahoo.com

8'ê Adarê, Roja Navnetewî a jinan



Perî Reşîdîyan

Li dîroka mirovahiyê de em rojên girîng û taybetî dibînin. Hamû netew û walat jî xwedî rojên birûmet û xasmanî ne. Li vê navberê de hin roj li

cîhanê de hene ku rojên nevetewî ne. Hemû cîhan xwe li wan rojane de beşdar dibînin û hesta nêzîkatî û yekêtiya bihevî dikin. Roja 8'ê Adarê jî, yêk ji wan rojên girîng li dîroka jinan deye ku hemû jinên cîhanê nêzîkî hev dike.

Pirsa jinan jî pirsê siyasî, civakî, abûrî û mirovî ye. Jinên cîhanê hemû ev pirsene zêde yan kêrkerandine û pêre jiyane û dijîn. Jinên cîhanê hemû ew êş û azarên ku derheq bi jinan tene kirin, hîs dikin û li eşa wan de xwe beşdar dibînin. Niha sedsalek û nîv e ku li ser bûyera nexweşa New Yorkê re derbas dibe. Li sala 1857'an de jinên kedkar ên fabrikeya ristin û raçandina bajarê "New Yorkê" bi armanca zêdekirina mîaşê xwe û kêrkerandina dema kar, meşek lîdarxistin, lê belê ew meş, ji aliyê polîsan ve hate tepeserkirin û çendî jinan canê xwe ji dest dan. Dîroka 8'ê Adarê vedigere bo wê bûyera nexweş ku li New Yorkê de rûda. Li sala 1975'ê, ev roje wekî rojê navnetewî ji aliyê Netewên Yekbûyî ve hate diyarkirin. Hemû jinên cîhanê para xwe li wê roja dirûkî de hene. Ew roj, diroşim, ala û dengê hemû jinan e li dijî bêmafî, zulm û tund û tûjiyê. Ew xebata li her derên cîhanê berdewam e. Li hin welatên cîhanê de jin heya redêyeke berçav gihîştine mafên wehevîyê û hikûmet û yasa îznê nadin ku mafê jinan bihê

binpîkrin. Lê belê li gelek welatên cîhanê de, mixabin hê jî jin û mafê jinan tişteke tabo ye û civak, ayîn, malbat, yasa û hikûmetê bihevî dest dayne ber çavên xwe û tişteke binavê pîrsa jin nabînin û naxwazin bibînin. Jî. Gelek welatên Afrîqa, Asiya, Amerîkaya Latîn û Rojhilata Navîn li wê kategoriyê de ne. Li welatên skandinavi de, mirov mafê wekhev li Yasaya Bingehîn, yasayên medenî, organên biryarder û hemû dem û dezzeghên dewletî û private de dibîne û ji ber wê ye ku ew welatane li warê civakî, asayîşa civakî, azadiya raderbirîne, civaka pêşketî, abûriya welat, mafên tekekesî, perwedeya durut û zanistî, demokrasî û çend destkevîtin din li cîhanê de bi nav û deng in. Lê mixabin li welatên paşketî yê Afrîqa, Asiya û Rojhilata Navîn de, jin hêsta basê mafê dengdan, perwerde, kar, hatuçû, cil û berg û gelek mafên herî sereke yê jiyane dikin. Li wan welatan de Yasa, Ayîn, Kultur û civak pêşî li hemû mafên jiyane ji bo jinan digrin.

Mixabin em jinên kurd jî li hemû parçên Kurdistanê de, kêrkerandina zêde ji gelek mafên jiyane serbest û azad bîpar in. Li Başûrê Kurdistanê ronahiyek kêrkerandina halê geşbûnê de ye. û bi hemû hêza xwe li gel mîrên femînîst, xebata ji bo mafên wekhev dest pê kirine. Lê Prosesêk demdirêj e û hewce ye ku civak, hikûmet, dezzeghên dewletî û organên pêwendîdar bi jinan hemû bikaribin vê xebatê bihevî pêşve bibin û li vê derheqê de zêde kar li ser hişyar kirin û perwerdekirina Civakê bihê kirin. Li Îranê de ji berku hikûmetek dijî kurd û dijî jin li ser kare, jinên kurd du zulman dikişînin. Yek zulma netewî û ya din steme cinsî. Lewre jinên kurd niha her du xebatan him ji bo rizgariya netewî û him jî bona mafê wekhevîyê bihevî dimeşînin.



Xebatek ku heya niha nîrxek yekcar zaf daye, lê carê bi armanc negihîştîye.

8'ê Adarê, roja berxwedanê ye, Roja hevpêwendîya Cîhanî a jinan dijî zulm zoriyê ye, roja rêzgirtin ji xebat û tekoşîna jinan e, roja hişyar kirina jinan bo mafên wekhev e û wekî gelek rojên din yê dîrokî bi xwîn û kedekî zaf hatiye tomar kirin. Lewra Pêşketina her welatekê girêdayî bi mafên wekhev li navbera jin û mêran de ye. Li vê derheqê de Xebat ji bo mafên wekhev, erkeke e ku dikeve ser milê herdu regezan. Jin û mêr bi hevî girêdayî ne. Her du bihevî jiyane dikemilîn in. Bi wateyek din ne jin bê mêran dikarin bişî, ne ji mêr dikarin bê jin bişî. Lewre cîhan ya me hemûyan e û me hemûyan jî ev mafe heye ku bi serbest bişî.

Xwekuştina sê jinan di kurdistanê Rojhilatê de

Li çend rojên borî de, di bajarê Merîwan û Sine de sê jinan xwe kuştin. Malpera "HARANA" di vê derbarê de ragihand, roja 10'ê Şibata 2010'an, kesek bi navê Mêhrane Şerîfî xelkê bajarê Merîwanê, bi sedema pîrsîrêkê civakî bi



awayê, daliqandî xwe kuşt. Tê zanîn Mêhrane di sala borî de jiyana hevbeşî pêk anibû.

Wê çavkaniyê herwiha da zanên, roja 18'ê Şibata 2010'an kesek bi navê Vîda Ezîziyan, xelkê bajarê Sine, ku heftiyêk berî niha, bi sedema pîrsîrêkê malbatî xwe şewtandibû, bi sedema bandor bûna şewtîne di nexweşxaneyê Bêseta bajarê Sine de jiyana xwe ji dest da.

Herwiha jinekî din bi navê Reina xelkê Tazawaya bajarê Ciwanro ku xwedîyê heft zarokan e, agir ji canê xwe berda, bi wê sedemê jiyana xwe ji dest da.

Strês, pîrsîrêkeka mezin a jiyana nûjen e

Stres tê wateya "giraniya borandina jiyane". Di jiyane de hêz û giraniyeka her tiştî heye. Di kargehê de, di tîkiliyên mirovan de, di malbatê de hwd jiyane xwedî tempoyek e.

Ev tempoya han, hin caran zora tempoya mirov dibe û mirov xwe di bin giraniyê de hîs dike. Ew e. strês. Strês herçendî negatîf, ew çendî jî pozîtîf e. Stres mirov ditetîkîne ku mirov karê xwe

di tempoya jiyane de bike û biser bikeve. Her mirovek xwedî toleransek e. Hin kes zû dikevin strêse, hin jî dereng an kêrkerandina. Strês xwedî vîzyonên biyolojîk, psikolojîk û fîzyolojîk in. Li ser fîzyolojiya strêse, gelek xebat hatine kirin. Dema organîzmaya mirov bikeve xetereyekê, yan bar giran bibe, organîzma dikeve alarmê. Bi her aliyê ve berpêyên xwe nîşan dide. Organîzma dixwaze û lêdigere ku serî bi vê rewşa nû re derîne, dengeyekê ava bike. Helbet organîzmaya her mirovek gorî taybetiya xwe reaksiyon dide. Heger organîzma serî bi vê rewşa nû re derneyne, angos strês zora mirov bibe, ziyane dide. Ziyane xwe bi her alî ve dide der. Hin cureyên sîmptomên psikosomatîk ji ber strêse ne. Herwekî strêsa mezin ziyane biyolojîk, fîzyolojîk û civakî didin. Pîspor di wê baweriyê de ne ku, jiyana nûjen û tempoya wê gelek ziyane dide mirovan. Mirov dikare bêje stres, pîrsîrêkeka mezin a jiyana nûjen e.

Lê strês kêrkerandina jî, divê hebe. ji ber ku strêsa kar û xebatê alîkariya serkeftine jî dike. **HAWAR NET**



Du Îranî Û Pênc Îtalî Bi Tawana Qaçaxa Çekan Bo Îranê, Hatin Girtin

Dozgerekî dijî terorîzm li Îtaliyayê, roja çarşemî, 03.03.2010'an ragihand ku du Îranî û pênc Îtalî bi tawana qaçaxa çekan û bînpêkirina dorpêçên navnetewî derheq Îranê, hatin girtin.

Armando Spataro, dadistanê dijî terorîzma Îtaliyayê, di konferansek çapemeniyê de ragihand seba vê yekê ku pîrsa han di asta navnetewî de girîng e, lêkolîn di vê derbarê de xwedî bihayek pirr mezin e.

Di vê pêwendiyê de Serheng **Wîncenzo Andirune**, got: Wan kesan dixwastin hejmarek zaf ji mûşekên dijî Tang û madeyên teqîner bişînin Îranê.

Pêka vê raporê, **Hemîd Meisûmî Nejad**, 51 salî yek ji girtiyan e ku xwe wek rojnamevan daye nasandin û akinciyê Romê ye. Herwiha Humayûn Bextiyarî, yekî din ji girtiyan e ku karê xwe îlan nekiriye. Li gor rapora berpirsên Polîsê vî welatî, ev du Îranî tevî pênc Îtaliyan, di bajarê Torîna a Îtaliyayê de hatine girtin.

Wîncenzo Andirune, derheq şûnasa girtiyan dibêje: Pênc kesên Îtalî, birêveberên şîrketên hinartin û anîhê û herwiha şîrketên moxabirati ne.

Dewleta Îranê heya amadekirina vê nûçeyê, derheq girtina 2 Îraniyan û herwiha tawanên lêdayî bi wan, tu helwestek negirtiye.

Kongireya Netewên Îrana Fedral:

Siyaseta zimankujiya Şowenîzma hêjmûnîxwazî, dijî netewên Îranê bi tundî dom dike.

Kongireya Netewên Îrana Fedral di daxuyaniyekê de bi hilkevta roja cîhanî ya Zimanê Zikmakî ragihand, di dema desthilatdariya Şowenîzma hêjmûnîxwazî ya zimanî, çandî û siyasî de, li Îranê de siyaseta zimankujî û çandkujî bi awayeke bername dijî netewên Belûç, Turk, Kurd, Ereb, Turkemen, lor û... bi dijwarî dom dike.

Kongireya Netewên Îrana Federal, tevî Şermezarkirina siyaseta jînosayda aram ji aliyê şowenîstên desthilatdar, radigehîne ku Çavniheriya hevşêwe ji tewahiya azadîxwazan, yeksanîxwazan, rewşenbîran û çalakên siyasî yên Îranê bo şermezarikirina wê siyasetê heye.

Kongireya Netewên Îrana Federal, herwiha piştgiya xwe li pêkanîna xwenîşandanan di kom û civînên giştî yên navnetewî de bo haydarkirina xelkê cîhanê li hember bînpêkirina wî mafê siruştî "xwendin bi zimanê zikmakî" yên zarokên ne fars ji aliyê Îraniyên derveyî welat ve ragihandiye.



Xelatên Oscarê 7'ê adarê dê di merasîmekê de bihên êşkerekirin.

Xelata Akademiya Filman a Amerîkayê Oscar, dê ew berhem û hunermendên ku hêjayî vê xelatê hatine dîtin, li Şanogeya Kodakê ya Los Angelesê di merasîma 8'emîn, bi pêşkêşiya Steve Martin û Alec Baldwin, bêne aşkerekirin.

Oscar, ji aliyê akademiya Huner û Zanîstên Sînemaya Amerîkayê ve tê belavkirin. Xebatên amadekariya wê, li ser malpera wê ya resmî û malperên sektora sînemayê saet bi saet têne



ragihandin. Şeva Yekşemê dê merasîma "82'emîn a Xelatên Oscarê", ji aliyê televizyonên çar aliyê dinyayê ve bi zindî bête weşandin.

Hate zanîn, bo çêkerê filmê Nicolas Chartier ê ku bi filma "The Hurt Locker" ji 9 beşan de wek berendamê Oscarê hate nîşandayîn, saziya Oscarê qedexe danî.

Li gorî nûçeya malpera "news.softpedia.com", ji ber ku Chartier ji endamên akademiya re bi riya e-postayê gotiye, "Dengê xwe bidine me" ev qedexe jê re hatiye danîn.

AKnews

Kaniya Helbestan

Pêşmregê Viyanê



Bêhzad Simko

Ev destê min dûre ji destê Viyanê
Bi hawar û qîrîn viyana min kanê
Ji derd û kul û êş ez nebûm yê manê
Hey dilê reben ev dildara te kanê
Wir min Tifeng helgirt ser xwemanê
Rêya viyana min, doza Kurdistanê
Ezê peyda kim derdê xwe ra dermanê

Heta peyda kim destê eşq û jiyanê
Ber viyanê, ez Pêşmeregê Kurdistanê
Heta hebe xwîn li ra û ruh ber manê
Wextê peyda bû roja geşa viyanê
Viyana, hate destim ser Kurdistanê
Viyana û evîn tek eşqa Kurdistanê
Zagros, mêrxwaze ser welat nav meydane

Hezar! Sale ber Kurdistan nav meydane
Şere tek, ser şerefa axa goristanê
Viyanim! Canim feda be bo Kurdistanê

Ey Viyan! Tu eşqa minî ez heyranê
Ezê te xilas kim; ey cane civanê!
Tek tu Kurdistan! Ya minî ey viyanê
Navê te, her tim, şev û roj, ser zimanê

Her kes ku heye evîna Kurdistanê
Hezar-hezar ji stêrkên nav esmanê
Çav lêdidin tenê li ser eşqa viyanê
Viyanê! Evîndarê te li zîndanê
Ji evîn ev ber dujmin serî nadanê
Evîndarê te li zîndan ser darê îdamê;

Ber eşqa te zor geşe û lêv xendanê
Hinek Şehîd û hinek ji berxwedanê
Ji evîna te ra mirin; Kurdistanê!
Zagros, ser eşqa viyanê çû zîndanê
Çûye rêya merg û nemanê ber viyanê

Kurte Hевpeyvînek Bi Herdu Hunermendên dengxweş: Şervan Û Erefat Re

Hевpeyvîn: Cefer Mubeşirniya

Bi hilkevta roja evîndaran(14/2), li ser gaziya Yekîtiya Ciwanên Demokrat ên Kurdistanê Îranê, du

hunermendên ciwan û dengxweş ên Kurd li Bakûrê Kurdistanê bi navên Şervan û Erefat, kunserek li bajarê Koyê (Kurdistanê Îraqê), lidarxistin. Hejmerekî berbiçav ji heyran û hezkiriyên dengê wan li kunserê de beşdar bûn û bi stran û dengê zelal û xweş yên xwe, germahiyek taybetî dan kunserê û beşdar û heyranên xwe ji ecibandin. Her çiqas ku dema wan hindik bû, lê Duheftenameya Agirî ew derfet bi giring zani ku heger bi kurtî ji be, çend pirsiyaran arasteyî wan her du hunermendan bike. Bona wê ku him rêz ji huner, ked û mandibûna wan bigre û wekî erk bi nisbet dengxweş û hunermendên xwe emegdar be, him jî wan zêdetir bi xwandewanên xwe bide naskirin û ji vê riyê ve jî xizmeta wan bike. Wan birêzan ji herçiqas ku kêmasiya demê hebûn, lê dîsan bi dilgermî ve daxwaza me pejirandin û bi kurtî bersiva çend pirsiyarên me dan. Deqa axaftina me li jêr de dikeve ber çavê we xwendevanên hêja!

Berî her tiştî em bixêrhatina we bo Kurdistanê Başûr dikin û dixwazim ku Hunermend Erefat ji zarê xwe ve bi xwendevanên Agirî re bidim naskirin, keremke?

Belê di pêşiyê de ez spasiya we dikim û keyfxweş im ku niha ez li Kurdistanê azad deme. Ez stranbêj Erefat, li sala 1973'ê Zayînî de li Kurdistanê Bakûr li bajarê Wanê, devera Qelqeliyê û li gundê Sedmasê ji dayîk bûme. Min li biçûkatiya xwe de hez ji mûzîkê kiriyê û wê demê min stran li radyoya Êrîvanê de guhdarî dikirin û ji hemûyan bêtir jî, min ji hunermendê bi nav û deng Şivan Perwer hez dikir. Li rastî de stranên wî tesîr û bandorek pir mezin li ser min kir ku ez dest bi hunera stranbêjiyê bikim, her bi wê evînê, min jî stranên şorşgerî hez kir û niha jî jê hez dikim û weke karek hunerî ji bo xizmetê kirin bi hunera kurdî û pêşxistina çanda kurdî min şopandiye û dişopînim.

Herwiha hunermend Şervan, em bixêrhatina we jî dikim û dixwazim ku hûn jî bi kurtî xwe bi xwendevanên me re bidin naskirin.

Ez jî her mîna hevalê xwe gelek keyfxweş im ku niha li wirim. Ez jî hunermend Şervan, li sala 1984'an li devera Xosêbê li gundê Paçanê ji dayîk bûme û min ji zaroktiya xwe de ji hunera stran gotinê hez kiriyê û bi guhdarîkirina hunermendên birêz ên Kurd û ji wan jî, dengê hunermend Kazo pir hez dikim û bi wî awayî dest bi hunera stran gotinê kir û huner û sitrana kurdî yê bûye parek ji evîn û heviya jiyana min.



Gelo Hunermend Erefat heya niha xwediyê çi berheke ye?

Min heya niha çi albomek çênekiriyê, lê min li kanalên herêmî de kilîp çêkirine û dihehî weşandin, lê eve cara yekemîne ez dihehî başûrê Kurdistanê û kar dikim jibo çêkirina albomekê.

Kek Şervan çi bû sedem ku hûn stayleke resen a stranên Kurdî hilbijêrin? Gelo we heya niha çi berhemek derxistîye yan na?

Armanca min ew bû ku bi guharîn û dest pêkirin sitaylek nû bikarim evînê û hugiriyek zêdetir ji nava dilû guhdarên dengê Şervan û pêşxistina hunera kurdî çê bikin.

Her bi vê staylê jî, li sala 2007'an de albûma min a yekemîn derket û ji strana xwe ya bi navê Semê re, min kilîp çêkir. Her wiha sala 2010'an de min albomek din bi navê "Min bihstî tu poşmî" amade kirye.

Kek Erefat hûn bi çi staylekê stran dibêjin?

Min jî bi mûzîka resen a Kurdî dest pêkiriyê, lê piraniya stranên min şorşgerî ne û bi rastî di Qonaxa niha ya tevsera rizgarê xwaz a gelê kurd de û xebata Şorşvanî û birûmet a xurtên me ew stran pêwîst in û cihê taybetî yê xwe heye.

Kek Şervan bi baweriya we bandora mûzîka netewên hakim bi ser Kurdistanê de li ser mûzîka kurdî li her parçeyên Kurdistanê heye yan na?

Zimanê Kurdî her yek e û herçiqas ku Zarawên cur bi cur hene jî, lê bi rastî jî ew tesîr li ser mûzîka Kurdî heye û mixabin her ku diçe, ew tişt zêdetir jî dibe.

Kek Erefat çima te stranên şorşgerî gotin?

Birastî her tiştek ji pêş çavên mirov e û ew bûyerên çêdibin em dikin sitran, tiştek zêde em nabêjin, xêncî rastiyan ku bi

bawera min em bi heq dibêjin ew jî nîşana wê yekê ye ku stranên şorşvanî heya niha jî zindî ne û ji bo gelê me hewce ne, ji berku gelê me carê li xebata bo destveanîna maf û azadiyên xwe de ye. Hêj em tîn tepeser kirin, çimisandin, neheqî li me tê kirin. Bi giştî stranên han hesta netewî geştir, bihêztir û kurdan hişyartir dikin. Lewma ez him wekî hez û elaqeya xwe û him jî wekî erk wan stranên dibêjim.

Kek Şervan raya we li ser stranên şorşvanî çîye di dema niha de?

Eva rastiyeke e ku berê medya u ragihandin tunebûn û her tiştek di dîroka me ya siyasî de ji rîya stranên şorşvanî ve dihatin guhdarîkirin. herçiqas niha medya û ragihandinê Kurdî hene, lê heya niha jî gelê me bîndest e, lewma ji bo wan medyayan jî û bi giştî bo gel jî stranên şorşvanî pêwîst in û niha jî bandora erênî ya xwe hene.

Kek Erefat her çend ku gelek pirsiyarên min hene û dixwazim bersiva wan bizanim, lê jiberku hûn gelek bilezin, dixwazim li derfetek din de zêdetir we li ser huner û mûzîka kurdî binim ziman. Lê ger we gotinek hebe?

Spasiya we dikim, herçend ku min jî pê xweş e zêdetir li xizmet we û xwendevanên Agirî de bim, lê dema ku hûn hatine, ne munasib e û hûn dibînin ku em mijûl in. Lewre em daxwaza lêborînê ji we û xwendevanan dikin. Îşala emê li derfetên din de bêtir bihev re bipeyvin.

Kek şervan eger we jî gotinek hebe?

Em li ser daxwaza Yekîtiya ciwanên Demokrat ên Kurdistanê Îranê deiwetî vir bûn, gelek spas ji bo wan û herwiha spas jibo we xebatkarên Agirî re.

Şiroveya Gotinên Pêşyan

Beşa 11



Çiya Mazi

"Ji ber ku peyv kêr hatine bikaranîn nayê fêmkirin. Eslê wê ev e: 'Destê pîşîtiyê bide, wê bi rûyê xwe were'. Lê ev jî kêr e. Bi baweriya min wê wiha hatibe gotin. 'Yê bi destê xwe têkeve pîşîtiyê

wê rûyê wî jî têkeve nav' e. Ji xwe wateya wê jî ew e, ku hinek bi destê xwe an bi hindikî têkeve nav karên xerab, demek din bi hertiştî xwe dikeve û êdî nikare xwe jê xelas bike. Bi hindikî destpê dike lê dû re nikare xwe xelas bike, bi pîrî ve dihere. (Ç. Mazi)"

1. "Dinya ji kesî re nabê yar" û "Herkes li benda xwe disekine" ev jî ne gotinên pêşyan ne. Metelok (Ozdeyîş) in. "Nabê" jî nin e. Gere "nabe" bit. Rastiya gotina duyem jî "Herkes li benda roja xwe ye" (Q. Dêrsilavî)

"Hinek gotinên pêşyan henin ku di nava ferhengê de jî pir in, wekî tasavufî tê dîtin. Û dibe ku bi wî awayî jî hatibin gotin. Lê bi sedsalan hatine gotin û êdî jî oldariyê tasavufiyê derketine, di nava mirovan de bi wate û jî bo tiştine din jî tê gotin. Ev gotina bi oldarî li ser dinyê hatibe gotin, ku wekî 'mîrov giş dê bimîrin' in. Lê êdî jî bo gelek tiştên din tê gotin. Mînak; ku hinek milkekî mîrov bixwin an bi darê zorê jî mîrov bistînin jî, mîrov dibêje 'dinya ji kesî re nebûye yar'. An 'dinya ji kesî re nemaye'. Ji ber wê yekê jî, gotinên wiha êdî bûne gotinên pêşyan. Lê dibe ku li nava gelek netewan bêne bikaranîn. Ev jî tiştêkî xwezayî ye. Lê li nava her neteweyekê bi awayekî din têne gotin. Ev jî wekî Brêz Dêrsilavî jî di şiroveya xwe î serî de bahs kiriye ku gotinên pêşyan hinek jê dibe ku navnetewî bin. Ew dibe malê çend neteweyan. (Ç. Mazi)"

2. "Kêmaniya kesekî ji kesî re nabe kêman" Yanî çi? Gelo hûn karin çi wateyê li vê gotinê kin? Gotin hatiye guhestin. Gelo ne "Tunebûn ji mîran re nabe kêman" be. (Q. Dêrsilavî)

"Ev gotin berevajî gotina 'Golîkek navê garanekê xera dike' ye. Ku mirovek çî dike ji xwe re dike, kêmaniya wî jî wî re ye. Nikare xisarê bide hinekî din. Carinan li gor rewşê, gotin berevajî hevdu hatine gotin. Mînakên wiha jî pir in. (Ç. Mazi)"

3. "Kesê piştî wî tunebe, serê wî tim tewardî ye" Ez bawerim ku em vê gotinê jî tîxin sitûyê pêşyan, dê di xew de marê wan were me. Gelo hûn karin herêma vê gotinê beyan bikin. Min tiştêkî wiha bihîstî ye: "Li zik xistine, gotiye ay piştî min." Ev jî dibe biwêj ne gotina pêşya ye. (Q. Dêrsilavî)

"Lê hin biwêj hene bi formekê dibin biwêj û bi formekê dibin gotinên pêşyan. Wekî me di şiroveya nivîskar de jî diyar kiriye ku hinek gotin di navberê de jî dimînin. Brêz Dêrsilavî jî vana re gotiye "metelok (özdeyîş). Mijara herêma jî, ne gengaz e ku mirov gotinên pêşyan yên li herêma de bê gotin, bibihîze. Li herêma de din, dibe ku bi awayekî din bê gotin. Ev jî xwezayî ye. her du gotin jî ne wekî hev in, wateya wan jî cûda ye. (Ç. Mazi)"

Ti pêwendî di navbera "Kesê piştî wî tunebe, serê wî tim tewardî ye" û "Li zik xistine, gotiye ay piştî min." de nîne. Her yek tiştêkî din e. Gava mirovek bêkes be, dê her kes zorê lê bike û serê wî bitewîne, lê gava ne bêkes be, ti kes

nikare zorê lê bike. Ez gotina jorîn bi vê maneyê fêhm dikim. Gotina din bi temamî tiştêkî din e. (M. Reşîd).

4. "xwesara kesî di ronahiyê de çê nabe" Gelo biyaniyan gotin nivîsî ne? Ne min tiştêk jê fêhm kir ne jî texmîn. (Q. Dêrsilavî)

"xweserî, wekî xwerû bûn e, an azadî ye. Wekî dibêje, 'azadiya kesî bi xweşî nayê' ye. ev yek jî gotinê li rastiya xwe disekinê û bi ya min rast hatiye gotin lê dîsa mirov bi qutibirî nikare bibêje wiha ye. dibe ku 2 xweser bi wateya 'xisar' jî hatibe gotin. (Ç. Mazi)"

Ez tiştêkî din jê fêhm dikim. Ez bawer dikim, ku "xwesar" jî gotina erebî "xesar" yanê "zîrar" hatiye. Hîngê "Zîrara kesî di ronahiyê de çênabe" tê wê maneyê, ku gava pîrs û mijar zelal bû û her tişt derket meydanê, rastî tê xuyakirin û di rastiyê de mafê kesekî nayê xwarin. (M. Reşîd).

5. "Bi hevalê xwe neken, wê were serê te jî" Ev jî ne gotina pêşyan Kurdan e. A pêşyên Tirkên ku "Gülme komşuna, gelir başına" û a pêşyên Eraban e, ku orjîna wê jî "Men deqe, duqe" jî xwe beyan e, wate xweş be jî, gotinên wê bê sir in. Belkî bi Kurdî jî hebe, lê ne bi vê formê. (Q. Dêrsilavî)

6. "Hilneweşîne, wê hilweşînin" ez baş dizanim ku ev jî malê netewên biyanî ne. Qey gelo di zimanê xwe de kêmanî didît. Gotinên pêşyên Kurdî têra vî çend rupelê me nedkir? (Q. Dêrsilavî)

"Rast e, herdu gotin jî dibe ku ji netewên cîran hatibin, dibe ku yên pêşyên Kurdan be jî û dû re gelên din gotibin, li wir jî hatibin gotin. Ev rewş ya sedên salan e. Ji ber wê yekê jî tiştêkî xwezayî ye. Ne hewceye ku mirov jî bo gotinên wiha pir qutibirî helwestê daye. (Ç. Mazi)"

Ez ne ji vê baweriyê me, ku gava gotineke mîna vê li ba gelên din hebe, hîngê ew ya wan e. Li gor lojîk, di rewşê wilo de, sê îmkân hene:

dibe ku wan jî me biribe, dibe ku me jî wan biribe, dibe ku rewşê wisa peyda bûbe, li ba me jî (bêyî bandora wan) û li ba wan jî (bêyî bandora me) ev gotina hatibe afirandin.

Gelo çima em li vir hema tenê îmkana duyem distînin û bawer dikin, ku ev gotin ya gelên din e? Ma ne ev jî kêmbaweriya me bi çand û kelepora me tê?

Ev gotina jorîn ya duyem, li herêma me jî heye û bi vî awayî tê gotin:

"Bi hevalê xwe mekene, ê were serê te jî". Baweriya min jî, li vir, wek ya Ç. Mazi ye.

(M. Reşîd)

7. "Kar bi taxpaşkirinê pêk nayê" (?) Gelo kê jî vê çî fêhm kir. Min gotineke weke "Gayê texbeşo" bihîstî ye. Lê ez bawerim ew jî biwêj e. (Q. Dêrsilavî)

"Taxpaşkirin di vê derê de wekî ku ji peyva "dabaşkirin"ê hatiye. Wekî ku mirov dest bi karekî bike, pêşî mirov dabeş bike an par bike, lê piştî wê divê mirov dest bi kar bike û biqedîne. Bi dabaşkirinê tenê çênabe. Wateyeke din li herêma torê tê bikaranî jî ev e (bi baweriya min a rast jî ew e) 'Kar bi taxpaşkirinê pêk nayê', wekî kar ne ew tişt e ku tenê mirov taxan li paş xwe bihêle û bibêje kar xelas bû. Ango, divê mirov bi bîngêhîn û zexm kar bike, herwiha ev gotineke pêşyan e û darizandin û hukûm tê de heye. (Ç. Mazi)"

Pîrsgirêka vê gotinê di "taxpaşkirinê" de ye. Gelo ev bi rastî jî bîngêhîn "tax" û "paşkirin" pêkhatiye? Heke wisa be, hîngê şirovekirina

birêz Çiya Mazi rast e. Lê bi dîtina min, bi gelemperî mijara "Gotinên Pêşyan" ne pîrseke ewqas rihet e. Ez bi xwe vê gotinê nas nakim. Divê mirov bipirse, ka gelo ev gotin jî kû hatiye û li kîjan herêma tê gotin û hîngê jî wan bipirse, ka mebest jî vê gotinê çî ye? Dibe ku mebest tiştêkî din be jî. (M. Reşîd)

8. "Kes ji ber malê xwe ne ketî ye şerê me" tu wate têde nîn e. Min ev bihîstî ye "Kesî ji ber malê xwe neda ye kerra, berra" Yanî kesî malê xwe ne avêtiye, terka wî ne kiriye. (Q. Dêrsilavî)

"An 'kes ji ber malê xwe neketiye şerê kesî' ye. An forma ku em dibêjin dibe gotina pêşyan jî ev e "Kes ji ber malê xwe nakeve şerê kesî" gotinên pêşyan jî li gor herêman têne guherandin. (Ç. Mazi)"

Ev jî we ya jor, divê mirov bipirse, ka jî kû hatiye û mebest jê çî ye? Dibe ku bi vî awayî be jî: "Ew li dij me derdikevin, ne ku zirarek gihîştîye malê wan yan tiştêkî wisa, mesele tenê dexsî û hesûdî ye". Lê ev texmîn e, ez rastiya wê nizanim. (M. Reşîd)

9. "Kesê çavbirçî, kerê bi bar ve dadibeliîne" rastiya vê jî wiha ye û biwêj e: "Weke gurê çavbirçî, kerê tevî bar dadibeliîne". (Q. Dêrsilavî)

"Wekî berê jî me gotibû bi hin guhertina forman, biwêjek dikare bibe gotineke pêşyan û bi demê re wiha bûye. Wekî vê gotinê jî, dema ku mirov peyva 'kesî' bikar neyîne û 'weke' bikar bîne, dibe biwêj, ji ber ku mirov rasterast jî yekî re dibêje. Lê heke wekî peyva 'kesê' hebe tevahîbûn çêdibe û darizandin, pendîbûn û hukûm jî her kesî re çêdibe. Dema tenê "kerê bi bar dadibeliîne" be. dibe biwêj. (Ç. Mazi)"

Peyva "dadibeliîne" peyveke erebî ye, kurdiya wê "dadiqurtîne" ye. Li ba me biwêjêka mîna vê heye. Dibêjin: "Hêştir tev hawid dadiqurtîne". Ev jî kesekî re tê gotin, ku polperest û diravperest be, tenê kelk û meslehet a me dizane, hema çî keys û fersend ketê, her tiştî jî xwe re dibe, hesabê kesekî din nake. Ez jî biwêja jor jî vê maneyê fêhm dikim. (M. Reşîd)

10. "Wextê bira bira be, jina birê mehr nake" çî tîkiliya vê û gotina pêşya bi hev heye. Bi texmîna min vê gotinê Mahsum Qirmizîgul, di 1999 de derxistiye (qerfe) (Q. Dêrsilavî)

"Li gor ku min lêkolîn kiriye û bi baweriya min ev jî berê de heye. Wekî dibêje 'bira xêra bira bixwaze, jina wî mehr nake'. Lê dibe ku hinekî hetibe guhertin. (Ç. Mazi)"

Dîtina min jî li vir wek ya Çiya Mazi ye. (M. Reşîd).

11. "Esil winda nabe". Tu tîkiliya vê gotinê bi pêşya re nîn e. (Q. Dêrsilavî)

"Bi baweriya min wekî 'esalet winda nabe' ye. Esaletî jî di demên berê de bandorek wê hebû, ji ber wê yekê jî û ji ber ku hukûm jî heye gotineke pêşyan e, (mînak dibêje 'ev tiş wiha nabe'). Herwiha jî bo "esil" jî bê gotin dihere ser heman wateyê. Esalet bi xwe jî jî bîngêhê tî jî "esas" tê, "esas" jî nêzî "esil" e anga "jêderk" e. (Ç. Mazi)"

Ez jî wek Çiya Mazi "esil û fesil" jê fêhm dikim. Ev jî berê de heye. Gava kesek tiştêkî xirab û nebaş dike, dibêjin "Ew bê esil û fesil e" yan jî "Şîrê wî ne paqij e". (M. Reşîd).

12. "Zêr zingar nabe" Rastiya wê "Zêr di ku keve, zingar nabe" ye. (Q. Dêrsilavî)

"Zêr zingar nagire" bes e. Lê bi guherandina formê an li hin deveran bûye "zêr di ku keve zingar nagire" ev jî tiştêkî xwezayî ye. (Ç. Mazi)

Biryarek dîrokî: Tawana Helebçeyê Bi Jînosayd Hat Nasîn

Dadgeha
Pêdeçûnê ya Iraqê
tawana kîmyabarana
Helebçeyê bi
Komkujî (Jînosayd)
da zanîn. Biryar bi
piraniya dengên
dadveran bûye.
Herweha biryar e ew
tawan li madeya 12'a
Yasaya sala 2005'an



a dadgeha Bilind ya Iraqê de ku li dijî mirovahiyê dabû nasîn, bo madeya 11 ya wê Yasayê ku tawan bi jînosayd da nas kirin, bê guhertin.

Piştî 37 rûniştinan bo dosyeya Helebçeyê, dadgehê di 17'ê Rêbendana sala 2010'an de biryara darvekirinê bo tawanbar Elî Hesên Mecîd, derkir û li 25'ê Rêbendana 2010'an de jî ew darvekir. Weka tê zanîn Helebçe li sala 1988'ê ji aliyê Balafirên Artêşa wê demê ya Iraqê ve bi çekên Kîmyayî hat bombebaran kirin ku di encam de 5 hezar şehîd û 10 hezar jî birîndar bûn û hejmarek zarok jî di wê bûyerê de winda bûn û heya niha jî malbatên wan li pey wan digerin.

Uslo Li Hember Tehranê Sekinî

Dewleta Norwejê li hember biryara Komara Îslamî di pêwendî digel derkirina Balyozekî Norwejî ji Tehranê, biryara derkirina balyozekî Îranî li usloyê da.

Sedema derketina aloziya han di navbera rejîma Tehranê û Dewleta Usloyê,



vedigere ser vê yekê ku Norwej penaberîya siyasî daye Mihemedreza Heyderî, endamê berê yê balyozxaneyê Îranê di wî welatî de. Mihemedreza Heyderî, piştî tepeserkirina hovane a xwenîşandanên Îranê ji aliyê hêzên rejîma desthilatdar di roja Aşûrayê da, dest ji karê xwe kişand û ragihand ku ji niha vir ve dê xebatê ji bo mafê mirovan û azadiya girtiyên siyasî yên Îranî bike.

Keçek Kurd Bi Destê Hêzên Komara Îslamî Hat Kuştin

Li gor nûçeyê ku li bajarê Bokanê hatiye zanîn Gulçîn Salihpûr keçek 22 salî li malbatek feqîr û hejar a piştpepe a bajarê Mehabadê, ku di girtîgeha bajarê Bokanê de destbiser bû, bi egerek nediyar ji aliyê hêzên mirovkuj ên rejîmê ve hat kuştin.

Gulçîn Salihî di wan heyamên girtîgehê de berdewam di bin îşkencên nemirovane ên hêzên rejîmê de bûye, û egera wê yekê heye ku di bin îşkencê de canê xwe ji dest dabe. Hêjayê gotinê ye ku memûrên rejîmê bi bê haydar kirina malbata Gulçînê, ew li cihek nediyar veşartine û tenê bo demek kêr, îzna dayka wê dane ku keça xwe bibîne, herwiha hêzên Îtîlaatê gef ji dayka Gulçînê xwarine ku nabe bi çi awayekê bas ji nûçeya kuştina keça xwe bike.

Newroz bû rojek fermî a Cîhanê

Koma
Giştî a
Saziya
Netewên
Yekbûyî,
roja 21ê
Adarê,
yekemîn
roja
newrozê
weke "Roja



Navnetewî a Newrozê" binav kir.

Koma Giştî a Saziya Netewên Yekbûyî di civîna xwe a roja sêşemî, 23.02.2010'an, biryarnameyek di vê pêwendiyê de derkir ku têde hatiye: 21ê Adarê hevdem e tevî destpêka demsala Buharê û ji pitir ji 300 milyon kesan ve li sernaserê cîhanê de weke yekemîn roja sala nû tê pîrozkirin.

Civata Giştî a saziya NY herwiha daxwaz ji endamên xwe kiriye ku ji bo vê rojê xwedî pilan û bername bin.

Türk û Baydemir derketin TRT 6'ê

BDP'ê sansûra li hember TRT Şeş'ê da aliyekî. TRT Şeş'a ku ji destpêka xwe ve heta niha ji aliyê BDP'ê û PKK'ê ve laqayî protesto û amborgoyan



bûbû, di dawîya dawiyê de Ahmet Türk û Osman Baydemir da axaftin.

Ehmet Türk û Şaredarê Amedê Osman Baydemir, bo berhema şanoyî ya Haldun Dormen a bi navê "Çirokeke Zivistanê" daxuyaniyên bi kurdî yên taybet dan TRT Şeş'ê û di nûçeyên êvarê de hat weşandin ku weha bûn: Ehmet Türk: "Heger çandên li ser van axan, hevûdin nasbikin, wê pir baş bibe. Wenda bûna çanda kurdî, wê zerarê bide çandên din jî. Çand, tu caran nebûne dijminên hev." Osman Baydemir: "Di dîroka Tirkîyê de eve cara yekemîn e ku bi hesteke weha xweş çanda me hatiye ser sehnê. Bi vê yekê, di navbera çanda Kurd û Tirkî de pirek çêbû ye. Ez di wê baweriyê de me ku, bi vî awayî qeşemên di navbera çand û ziman de heyî, dest bi helandinê kiriye. Ez wusa difikirim ku biharek nû dest pêkiriye û ji vê yekê bi hêvî me." Rizgari